

---

## CYD-BWYLLGOR GWE – 23/11/22

---

### Yn bresennol:

**Y Cynghorwyr:** Beca Brown (Cyngor Gwynedd), Julie Fallon (Cyngor Bwrdeistref Sirol Conwy), Gill German (Cyngor Sir Ddinbych), Ieuan Williams (Cyngor Sir Ynys Môn), Phil Wynn (Cyngor Bwrdeistref Sirol Wrecsam),

**Swyddogion Heb bleidlais:** Dylan Davies (Cynrychiolydd Ysgolion Uwchradd), Jennie Downes (Yr Eglwys Yng Nghymru), Claire Homard (Cyngor Sir y Fflint), Marc Berw Hughes (Cyngor Sir Ynys Môn), Garem Jackson (Cyngor Gwynedd)

### Swyddogion yn bresennol:

**GwE** – Arwyn Thomas (Rheolwr Gyfarwyddwr), Alwyn Jones (Cyfarwyddwr Cynorthwyol), Bethan Roberts (Rheolwr Rheoli Perfformiad).

**Cyngor Gwynedd, yr Awdurdod Lletyol** - Dewi Morgan (Pennaeth Cyllid), Siôn Huws (Rheolwr Priodoldeb ac Etholiadau), Gwion Jones (Uwch Gyfrifydd), Einir Rh Davies a Lowri H Evans (Swyddogion Gwasanaethau Democratiaeth).

**Yn bresennol ar gyfer eitem 5 :** Yvonne Thomas – Archwilio Cymru

## 1. YMDDIHEURIADAU

Derbyniwyd ymddiheuriadau gan Dr Lowri Brown (Cyngor Bwrdeistref Sirol Conwy), Geraint Davies (Cyngor Sir Ddinbych), Karen Evans (Cyngor Bwrdeistref Sirol Wrecsam) ac Ian Roberts (Cyngor Sir y Fflint).

## 2. DATGAN BUDDIANT PERSONOL

Ni dderbyniwyd unrhyw ddatganiad o fuddiant personol gan unrhyw aelod oedd yn bresennol.

## 3. MATERION BRYS

Ni chodwyd unrhyw faterion brys.

## 4. COFNODION

Cadarnhawyd fod y cofnod a gyflwynwyd o'r cyfarfod ar y 5ed o Hydref, 2022 yn gywir.

## 5. CYMERADWYO ADRODDIAD YR ARCHWILIWR ANNIBYNNOL AR GYFRIFON GWE

Cyflwynwyd yr adroddiad gan y Pennaeth Cyllid a gadarnhaodd fod Aelodau y Cydbwyllgor eisoes wedi derbyn y wybodaeth (13 Gorffennaf) yn ei ffurf drafft, ond bod Swyddog o Archwilio Cymru wedi eu cymeradwyo erbyn hyn. Cyfeiriodd at dri chywiriad a wnaed i'r cyfrifon yn ystod yr archwiliad ac sydd wedi eu hamlygu yn Atodiad 3 fel a ganlyn :

Diweddarau nifer staff mewn rhai bandiau cyflog

Symiau arian grantiau - ym mha linellau maent yn ymddangos o fewn y cyfrifon (gweler yr eglurhad)

Cwpwl o wallau teipio, sydd wedi eu cywiro erbyn hyn.

Ehangodd Swyddog Archwilio Cymru ar yr uchod, gan gadarnhau bod yr adroddiad yn dangos darlun clir a theg, gan dynnu sylw at faterion :

Tudalen 4 – 441  
Gweithio yn annibynnol  
Llofnodion electroneg

Cadarnhaodd nad oeddynt yn faterion arwyddocaol, ac nad oes unrhyw gamddatganiadau.

Diolchwyd am yr adroddiadau manwl ac am y cydweithio.

## **PENDERFYNWYD**

Derbyn a chymeradwyo yr adroddiad ar ran Archwiliwr Cyffredinol Cymru, cymeradwyo cyfrifon 2021/22, ac awdurdodi'r Cadeirydd i lofnodi'r llythyr cynrychiolaeth ar ran y Cyd-Bwyllgor.

### **6. CYLLIDEB GWE 2022-23 – ADOLYGIAD CHWARTER 2**

Cyflwynwyd yr Adolygiad Chwarterol oedd yn rhagweld tanwariant erbyn diwedd 2022/23 fel a ganlyn :

Gweithwyr - Chwarter 2: tanwariant (£46,552) o ran costau staffio o'i gymharu â : thanwariant (£84,046) oedd yn cael ei ragweld ddiwedd Chwarter 1

Adeilad: Chwarter 2: gorwariant £25,367 o ran diffyg incwm, ond disgwylir i'r ffrwd incwm yma wella. Rhagwelwyd gorwariant o £25,367 ar ddiwedd Chwarter 1

Cludiant: Chwarter 2: tanwariant (£59,759), hyn o ganlyniad i lai o deithio a ffyrdd newydd o weithio. Diwedd Chwarter 1 rhagwelwyd tanwariant o (£46,771)

Nodwyd bod cronfa tanwariant o £91,900 net.

Adroddodd Rheolwr Gyfarwyddwr GwE bod Chwarter 2 wastad yn anodd ac mai yn Chwarter 3 (Medi i Ragfyr) oedd y prif weithgareddau ac y byddai yn disgwyl gweld newid.

Cwestiynwyd, gan nad yw reserfau yn cael eu caniatáu, tybed a oes isafswm trothwy reserfau? Cadarnhawyd nad oes cyfyngiad ar sut i ddefnyddio y gronfa tanwariant, megis ar gyfer pontio neu brynu amser. Nodwyd er nad oes ffigwr penodol, ond tybir o leiaf £100,000.

Atgoffodd Rheolwr Gyfarwyddwr GwE, cyn y cyfnod clo, fod y gyllideb wrthgefn wedi bod yn llai na £200,000. Nodwyd y bydd yn rhaid disgwyl am Setliad Rhagfyr a gweld y goblygiadau wrth fynd ymlaen.

Cyfeiriodd y Cadeirydd at faterion swyddi gwag a recriwtio gan holi a oes sialensiau o ran y sefyllfa secondiadau, a chadarnhawyd ei bod wedi bod yn sialens yn yr uwchradd ers rhai blynyddoedd ond ei bod yn bryder yn y cynradd erbyn hyn hefyd.

## **PENDERFYNWYD**

Cymeradwyo a derbyn yr adroddiad ar Gyllideb GwE 2022-2023 – Adolygiad Chwarter 2

### **7. CYNLLUN BUSNES RHANBARTHOL 2022-2023 GWE – ADRODDIAD MONITRO CHWARTER 2**

Cyflwynwyd yr adroddiad gan Reolwr Gyfarwyddwr GwE, oedd yn rhoi darlun o weithgarwch Gorffennaf i Fedi. Cadarnhawyd fod trafodaethau wedi cymryd lle ar y cwricwlwm, bod y gwaith cefnogi yn parhau a bod parodrwydd gan yr ysgolion i rannu lle maent wedi ei gyrraedd.

O ran Arweinyddiaeth, nodwyd y cynifer sydd yn mynychu'r cyrsiau gyda nifer ohonynt o bosib yn ddarpar arweinwyr ar gyfer y dyfodol.

Nodwyd ei bod yn braf gweld prosiect Llais Ni yn dwyn ffrwyth.

Holiwyd am y ffigyrau hyfforddi a chefnogi clystyrau o amgylch y trawsnewid. Nododd Rheolwr Gyfarwyddwr GwE eu bod ar bwynt o newid. Mae diffyg sylweddol o ran athrawon llanw, ac er ei bod yn dda cael y cyfarfodydd wyneb yn wyneb, mae cyflwyniadau yn cael eu recordio erbyn hyn oherwydd y pwysau ar ysgolion bychain. Mae gwahanol ysgolion ar lefelau gwahanol o aeddfedrwydd.

Cyfeiriwyd at dracio cynnydd ac asesu disgyblion, yn benodol o ran 360, a sut mae hynny yn cyd-fynd â'r fframwaith newydd. Cadarnhaodd Rheolwr Gyfarwyddwr GwE bod gwaith allweddol wedi ei wneud o ran sgiliau disgyblion a bod y gwaith tracio yn parhau.

Cyfeiriwyd at y Gweithdai Arfarnu a Dal Effaith, a nodwyd yr angen i dynnu papur at ei gilydd, gan weithio gydag ysgolion ar ffurf yr adroddiad, gyda yr un egwyddorion yn rhedeg trwyddynt.

Cadarnhaodd y Cadeirydd y byddai yn dda cael mewnbwn. Cadarnhawyd y byddai Rheolwr Gyfarwyddwr GwE yn dod â phapur gerbron pan fydd mwy o wybodaeth ar gael.

## **PENDERFYNWYD**

Derbyn a chymeradwyo yr Adroddiad Monitro Chwarter 2 - Cynllun Busnes Rhanbarthol 2022-2023 GwE.

### **8. BWRIAD I ADOLYGU TREFNIADAU GWEITHREDOL A'R STRWYTHUR STAFFIO PRESENNOL**

Cyflwynwyd yr adroddiad gan Reolwr Gyfarwyddwr GwE gyda chais am ganiatâd i wneud y darn hwn o waith gyda chefnogaeth y Cyd-Bwyllgor. Nododd y bydd y pwyslais ar gryfhau y cydweithio agos sydd eisoes rhwng GwE a'r Awdurdodau Lleol.

Nododd y Cadeirydd bod hwn yn amserol iawn ac y byddai y Cyd-Bwyllgor yn falch o gael y cyfle i roi sylwadau maes o law. Cadarnhaodd Rheolwr Gyfarwyddwr GwE y bydd y Cyd-Bwyllgor yn cael bwydo i'r papur a'i drafod ymhellach.

## **PENDERFYNWYD**

Derbyn a chymeradwyo y bwriad i adolygu trefniadau gweithredol a'r strwythur staffio presennol.

### **9. LLYTHYR Y CYDBWYLLGOR I'R GWEINIDOG Y GYMRAEG AC ADDYSG**

Yn dilyn y cyfarfod diwethaf a'r pwysau o ran atebolrwydd, cadarnhawyd bod llythyr wedi ei ddanfôn at y Gweinidog, â chopi wedi ei anfon i ysgolion y rhanbarth er gwybodaeth. Nodwyd bod y llythyr wedi cael sylw yn y Fforwm Prif Athrawon a bod y gefnogaeth gan y Cyd-Bwyllgor wedi ei werthfawrogi. Cadarnhawyd y byddai yn cael ei roi yn ôl ar yr agenda ar gyfer cyfarfod arall yn y dyfodol, gan fod ymateb hwyr wedi dod o swyddfa'r Gweinidog.

## **PENDERFYNWYD**

Derbyn a nodi cynnwys Llythyr y Cydbwyllgor i'r Gweinidog y Gymraeg ac Addysg

Dechreuodd y cyfarfod am 10.30 a daeth i ben am 11.20 y.b.

---

**CADEIRYDD**